

Pablo 'Shon Pa' Kelly, musico clave di Mariachi na Aruba

ORANJESTAD – Mañan, diasabra dia 31 di augustus lo tuma luga e Festival di Musica Mexicano. Pa cu esaki, Fundacion Artista bou auspicio di Unoca ta invita pueblo pa cera conoci cu Pablo Kelly, integrante clave di Mariachi Perla di Aruba.



Pablo Kelly a nace dia 23 di juli 1933. E ta e di dos yiu homber di Victoriano y Maria Salome Kelly. Pablo a lanta na Tanki Leendert den un famia di 8 ruman. Desde un edad hopi jong, Pablo a cuminsa toca trompet y a forma parti di tanto bandanan musical como gruponan di Mariachi.

Den e mundo di Mariachi, Pablo ta hopi conoci, como cu el a organisa diferente festivalnan di ranchera na Aruba y tambe a organisa festivalnan di ranchera ABC. Pablo a forma parti di Mariachi Aruba, Mariachi Perla di Aruba, Mariachi

Orguyo y Mariachi Lirios del Campo. Tambe Pablo a sa di representa Aruba internacionalmente den festival di Mariachinan na Ciudad di Mexico.

Mariachi Perla di Aruba tambe tin e siguiente historia di e bunita trayectoria musical di Kelly, cariñosamente yama 'Shon Pa'.

Na aña 1962 Kelly a ingresa den Mariachi 'Perla di Aruba'. E aña ey 'Pablo hunto cu Perla' a graba e prome disco 45 cerca Kelkboom, cancionnan: Un mal amor y Pobre Vaquero, composicionnan di Supriano v/d Linde, canta pa Bertando Henriquez. E tempo

ey 'Pablo hunto cu Perla' a compania Tito Guizar y Lilia Guizar den Show di 'Padu del Caribe y su Show'. Esey tabata na 1964. E aña ey Kelly a retira di Mariachi Perla di Aruba. Na aña 1979 Kelly a regresa 'Mariachi Perla di Aruba' pa bay toca na Festival di Antillas na Corsou. E Festival ey a ser organisa pa sr. Jossy Brokke Jr.

Na 1980 bao direccion di Kelly e prome longplay a wordo graba. Esey tabata cu e mesun cantantenan cu a representa Aruba den e Festival di Antillas. E mesun aña el a organisa e prome Festival di Cancion Mexicano riba tereno di feria na Sta. Cruz,



unda tur e mariachi di Aruba a participa.

Tambe el a organisa e prome Festival Infantil di Cancionnan Mexicano na Bonaire Club y tambe Antillas. E mesun aña el a organisa tambe un tour pa Mexico, y e Segundo Festival di Cancionnan Mexicano pa Aruba y Antillas. Na aña 1981 Mariachi Perla di Aruba a graba su di dos LP bao direccion di Kelly.

Sr. Pablo Kelly hunto cu 'Mariachi Perla di Aruba' a organisa den Club IO-WUA un Show di 25 Aniversario di Mariachi Perla di Aruba cu musica di mariachi y baile. Sr. Pablo Kelly a laga traha un 'Cancionero' na e ocasion di e 25 aniversario di Mariachi Perla di Aruba.

Na 1982 Kelly a organisa e prome Festival di Cancion Mexicano na Papiamento, na Club Caiqueto, y bao direccion di Kelly e di tres LP a wordo graba. Na aña 1983 Kelly a tuma su retiro di Mariachi Perla di Aruba.

Na aña 1992 Kelly a regresa cu Mariachi Perla di Aruba, cu tabata toca den tur hotel y algun sitio priva. Bao direccion di Kelly, Mariachi Perla di Aruba a biaha pa e prome 'Encuentro Internacional' di los mariachis Guadalajara.

Na aña 1995 Kelly a tuma su retiro y despedida di 'Mariachi Perla di Aruba'. Mariachi Perla di Aruba, bou direccion di sr. Miguel v/d Linde kier gradici Kelly pa tur e añanan cu el a labora cu Mariachi Perla di Aruba, pa su aporte, tempo y dedicacion

